

欽定剿平粵匪方略

欽定勦平粵匪方略卷一百三十六 乙卯年

九月初一日

辛酉

胡林翼奏言據署臬司李孟羣

稟稱八月初一日賊撲金口陸營李孟羣親督
水陸擊退初二日賊又悉銳而來李孟羣飭令
陸營堅守以待賊已敗退復糾大股分六路來
撲陸營始尙力戰繼乃潰散李孟羣趕調水勇
登岸救應因陸勇已散水師亦孤必須撥兵應

援等語臣思武漢之要以金口沌口蔡店爲最
著遂以陸師三千人留防金口飭李孟羣管帶
仍以水師護之臣自率陸師四千人渡江會彭
玉麟楊載福水師由蔡店冒險深入轉鬪而前
圍攻漢陽無如漢口無兵分守漢陽之城未能
卽下而黃州德安之賊分股來援初二初三日
賊以下游調來礮船轟臣營帳傷斃臣左右數

人適都司鮑超以礮船下擊賊乃退走臣思內
河寬不逾丈水師礮船不能久泊且漢陽之攻
戰方緊而金口之警報旋來臣若全軍赴援則
北岸皆爲賊有欲分軍回救則兩岸皆覺兵單
卽於初四日由漢陽退二十里駐蔡家嶺圖扼
蔡店以待北師而臣營勇糧已積欠至八九十
日不等因於麥山扼要安營初八日賊以大股

分七八路圍撲臣營各勇竟以無糧不肯出隊
臣激以大義督令出師強而後可逆匪以數千
抄後大衆散走臣現在一面督集潰勇暫駐大
軍山一面飛催餉項補放口糧現派鮑超設法
另募陸勇或可漸次整理惟軍氣旣頽非援兵
大集南北夾攻則武漢之克復難期逆賊之蔓
延更甚臣平時訓練不力督率無方以致藉詞

餉繼譁潰時聞應請將臣嚴行治罪以肅戎行
惟是武漢情形水師雖尙完全而大局實已危
迫荊州沔陽岳州等處均恐分軼滋擾不敢不
以實陳伏乞

天恩飭令川省廣籌兵餉速爲接濟則臣幸甚天下幸
甚

胡林翼又奏言湖北軍務喫緊急宜徵兵集餉

力保荆襄非南北夾攻楚蜀合力難期補救臣
謹就現在情形細審之臣軍藉口潰散即使收
集大半氣已不振副將王國才一軍更多冗雜
均應大加裁汰夫兵勇之不強患在不精餉卽
因之日絀若不藉此裁汰則正餉愈分而愈少
欠餉日積而日深外侮可虞內訌尤可慮查有
水師都司鮑超勇敢知兵臣已遣往湖南另募

新兵三千人迅來鄂省勦辦又思九江湖口江
面旣無水師卽使圍攻經年賊之往來自便不
如併力從湖南湖北節節打通乃可水陸東下
合於九江浙江甯紹台道羅澤南屢戰有功前
此臣曾國藩派勦義甯卽擬進攻武漢應請

飭下曾國藩仍派羅澤南一軍並益以精兵一二千迅
速來鄂會勦若仍株守九江似於大局無補至

荆州一府係東南一大關鍵

國家設立駐防鎮守立法至爲精微惟城兵太單
戰守均難分布萬一賊匪窺伺深爲可虞應請

飭下四川督臣黃宗漢速帶精勇一二千名親來荆州

鄂城一帶堵剿專督江漢之師兼理江漢之餉

庶臣等得以專意攻戰不虞餉竭此臣所擬陸

軍補救情形也至賊匪力踞長江之險非水師

得力不能制其死命曾國藩之創立水師實爲
識時務之要著自三板入湖九江遭風之後下
游久無水師故九江湖口安慶廬州均因江面
賊舟充斥湖港分歧陸軍竟不得手武漢幸有
擊船而臣之陸軍先散王國才亦稍稍引退水
師孤立賊蹤已繞出其後此時應以力保水師
暫屯嘉魚新隄等處以待陸軍之再整惟水師

十營未盡得力月需餉項四萬餘兩積欠七八十日不等不如及時汰去怯弱以節虛糜而養精壯臣與副將楊載福面商退屯新隄修整船隻將各營水師均交該副將親自揀選極力裁汰免致餉項日久更絀楊載福力主兵貴精不貴多之議誠爲洞悉機宜此又水師之應速裁汰者也應請

飭下四川督臣廣籌糧餉按月接濟臣亦當迅速整旅
早圖滅賊奏八

上命軍機大臣傳諭胡林翼曰此次賊匪由崇通興國
撲我金口陸營德安應城之賊亦從上游分竄漢口
兵勇潰散胡林翼暫駐大軍山收集潰勇加以裁汰
並募湖南得力壯勇以振軍威惟湖南募勇尙需時
日卽川兵亦恐未能速到著飭李孟羣王國才等力

圖整頓不可挫折銳氣使賊勢益張並飭楊載福趕將船隻修整以資防剿俟羅澤南一軍到楚水陸均有策應庶大局尚可挽回前據載增奏常恩在柘樹口遇伏兵敗以致賊撲蔡店漢陽之匪亦突出抄襲該署將軍欲親赴潛沔堵剿已令官文妥籌兼顧著胡林翼隨時咨商官文等不致顧此失彼方爲妥善上又命軍機大臣傳諭曾國藩曰金口蔡店等處陸軍

先後挫潰胡林翼由蔡家嶺移紮大軍山王國才亦引軍退駐水軍勢成孤立南北兩岸胡林翼兼顧爲難此時武漢賊情較爲喫緊著曾國藩仍飭羅澤南迅卽帶兵赴鄂會剿

上又命軍機大臣傳諭黃宗漢吳振械曰胡林翼奏餉絀兵潰請飭川督帶勇赴楚並飭四川等省按月濟餉現因胡林翼陸兵潰散水軍孤立無援官文已赴

德安萬一賊匪上竄窺伺荊州深爲可慮前有駐紮夔巫之署松潘鎮總兵德恩帶兵二千名著黃宗漢先令馳赴荊州一帶協勦其夔巫等處與湖北接壤防堵尤關緊要該督應否親自督兵駐紮並著體察情形酌量辦理至胡林翼軍營餉糈缺乏自應急籌接濟前已諭令吳振械速籌銀兩解往襄陽糧臺應用並著黃宗漢迅速籌撥源源接濟毋稍延誤

同日署江西巡撫布政使陸元烺奏言據九江鎮總兵居隆阿咨七月二十一日潯城賊匪千餘由西門新壩出隊經曾國藩派副將周鳳山等督勇由東路前進居隆阿督勇由西路前進奮力衝殺逆衆敗退入卡其湖內逆船直對我軍開礮我軍對擊逆匪中傷落水者十餘人擊沈賊船二隻餘船逃竄出湖二十四日丑刻居

隆阿會合周鳳山等分攻各門疊有斬擒該逆
城守甚嚴未能攻入又據候選同知李元度等
稟稱十九日進勦文橋之賊派劉希洛一軍爲
後路聲援李元度率左右二營由流芳市間道
繞抄文橋之後知縣李銀從九品彭斯舉各帶
兵勇分兩路夾擊斃賊一百餘人生擒逆匪劉
得勝等十名餘匪越嶺逃竄我兵卽駐文橋二

十一日湖口逆首僞承宣胡鼎汶親率悍賊千餘來撲李元度與李錕劉希洛分三路迎勦斬擒一二百名直追至蘇官渡駐營次日卯刻進攻湖口並約水師各營同時並舉劉希洛鼓勇而登大嶺殺守卡賊十餘名焚望樓三座將賊踞民房登時焚燬李錕由小嶺直抵西街跳牆而登奪其礮位殺其守門悍賊彭斯舉躍登黃

土嶺逆黨踞險守禦被我軍殲殺數十人餘俱潰散我兵追抵湖壩船上之賊開礮回擊哨官吳穩正等躍上賊船手刃二賊其舊城賊營亦被我兵攻入殲斃約三百餘人逆船計無所出均開赴中流攏近下鐘山午刻我軍水師駛至百礮雷轟焚燬賊船二十五號賊黨自焚坐船十餘號餘船狂竄下游我軍直摩賊壘賊衆墜

閉不出八月初三日探知安慶上竄悍賊千餘
人已抵湖口賊匪三百餘人至蘇官渡搦戰我
軍堅壁不出李元度密派右營吳齊源劉希洛
等各帶兵繞出賊後擊斃賊匪二名賊衆退走
數十步胡蓋南卽率衆馳之李錕督勇繼進各
營一擁而前逆匪退回半里許且前且卻鏖戰
五次賊始大潰湖口縣知縣岑連乙亦率團勇

前來策應追殺竄賊多名又據代理都昌縣馬
受祐稟稱江楚大兵攻勦徐家埠等處賊營逆
匪全力均在下游拒敵該員乘機率領團勇往
攻都昌縣城該匪聞風潰散收復城池該縣前
因地方失守革職效力茲能自行帶勇收復尙
知愧奮可否開復原官留江補用出自

天恩奏入

上諭內閣曰九江賊匪經江楚官兵連日獲勝辦理均屬得手代理都昌縣事縣丞馬受祜前因地方被擾革職效力現在率勇收復城池尙知愧奮著准其開復原官留於江西補用

初四日甲子向榮奏言查蕪湖城外長山官軍連

營之後該逆加築壁壘疊來衝突自應死守以待外援細閱畫呈各營地圖相距師船扼泊處

所中間尙嫌寬闊其右離陡門三里之弋磯與
左面沿江土坡必須添設一營扼斷賊援當經
飛飭鄧紹良等會同舟師妥商扼勦旋據該提
鎮等呈報初二日探有裕溪口西梁山賊船竄
過東梁山欲來援救蕪賊初四五兩日復探報
江北來賊嘯聚四合山大成鋪一帶欲分三路
來蕪打仗又聞旗羅山已有賊壘亟擬趁其屯

紮未定前往攻勦初六日四更尊食出隊往旗
羅山進勦該逆前來拒戰我兵奮勇衝勦該逆
披靡斃賊不下數百名十二日夜間賊乘江霧
迷漫又於陡門廣福磯山頭築壘並於弋磯山
南修成攔牆一道次日黎明德安派隊往攻該
逆從陡門丁橋分股前來抄綴經我軍左右奮
擊敗去先是鄧紹良探聞有江北賊股於初十

日竄入銅陵十一日到繁昌鵝橋盤踞是日戌刻復報該逆已至南繁交界之石碓地面意圖來應蕪賊斷我老鴉山糧道當經飛撥各兵往屯老鴉山舊營堵勦後路各等情呈報前來臣前以東梁山竄路未斷檄令沿江添築營盤而該提鎮以無兵抽紮稟請添兵卽經飛撥兵勇七百名前往並恐賊援久而益集函商浙江撫

臣抽撥兵勇援剿經何桂清調派四安防勇一百名及涇太義勇一千名前往黃池聽候調遣臣一面知會鄧紹良飛調駐徽川兵五百名及就近甯國兵勇並飭在蕪添募潮勇以資得力責成該提鎮等迅圖剿除內賊力截外援乃今上下游逆黨麤至兩面牽掣我軍跡其自東梁山步步築壘由陡門沿港築壘漸至弋磯已與

內賊聲勢通連實堪憤恨卽責令會商舟師設法奪占弋磯埽蕩內外賊壘嚴防老鴉山一帶後路並揀派遊擊陳明志管帶湖南精兵五百七十餘名馳往協同攻勦而內賊復乘夜於前卡之北弋磯之南山坡修壘一座以通外賊聲援十六日寅刻我軍分兩路攻勦先將陡門救應之賊掩殺擊走攻至弋磯山南排開槍礮擊

斃多賊十八日會同舟師分兩路進剿山西湖
口賊壘該處四面皆水我兵鳧水撲過賊濠擊
倒站牆數賊該逆死守不出總兵吳全美督領
划船快蟹攻進魯港內河適遇另股二千餘賊
經水勇登岸衝勦殲斃頗多又經陸兵抄到截
殺該逆退至北岸賊卡拒守該處接連山西湖
港汊紛歧亟難攻進是日晚間該逆復至弋磯

山北平地添築濠壘適陳明志楚兵已到出隊
分攻其南壘堅守不出惟北壘尙在修築經兵
勇衝勦破入逆壘砍殺多名伏思蕪城雖復賊
壘未除籌攻兩月江岸之賊尙衆而江皖賊援
大股踵至分屯數十壘兩面牽綴我軍勦辦殊
爲棘手蕪湖爲全局關鍵該逆以全力來爭亟
宜掃蕩該提鎮等未能妥速勦辦咎無可辭雖

克復蕪城本有微勞而調度不能畫一彼此意見未能融洽現在蕪湖各軍卽統歸鄧紹良調遣以專責成其添調各路兵勇計日均可雲集卽飭令乘此軍威會商師船相機勦辦或先勦山西湖魯港以扼小河南岸或分兵由東梁山代橋四台山進攻埽蕩內外賊壘以期廓清蕪湖奏入

上命軍機大臣傳諭向榮曰鄧紹良等會攻蕪湖賊壘已近兩月雖進攻不爲不力而賊壘陸續增添連日攻擊僅止破其弋磯山此一壘似此曠日持久賊援愈集勦辦愈難該大臣與何桂清添派兵勇計日均可到齊卽著統歸鄧紹良調遣以一事權務將蕪湖上下一帶賊壘全數掃除應先勦山西湖等處或由東梁山一路分兵進攻著該大臣飭知鄧紹良相機

辦理長山連營旣距師船扼泊處所尙遠水陸聲勢
卽恐不能聯絡並著傳諭鄧紹良與吳全美等會商
總期水陸並舉方不致爲賊牽掣

初六日

丙寅

兵部侍郎曾國藩奏言臣於上年十

月奏調安徽道員何桂珍來營助剿奉

旨允准嗣因江路梗阻該道不能渡江卽屯紮英山蘄
水等屬與賊匪接戰十餘次據報正月初六日

由英山督率兵勇抵羅田縣境適聞逆匪攻破
蘄水之信我軍分路進攻殺賊二百餘名乘勝
破城而入收復蘄水縣城殺賊五百餘名嗣聞
英山有太湖賊數千入境該道率同任春和等
分道夾擊該逆翻山逃竄二月初聞蘄州土匪
勾結逆賊數千欲由蔡家河進撲羅田該道飛
調阿克敦等進攻賊敗奔上山我軍併力仰攻

復殺賊四百餘人直追至蘄水縣之松柏坳二月十七日賊聲言將攻太湖該道知其詭計專力扼守英城賊果三路來攻馬超江奮勇急進刺殺僞總制田金爵一名實爲蘄黃一帶巨魁自該逆被殺賊卽大敗旋探聞賊匪爲田金爵復仇該道於英蘄交界之陳家畝紮營並分兵埋伏賊由朱陽河蠡擁而來我軍迎擊殺三百

餘人逸賊踞查兒山爲負嶠之計我軍潛由雞
鳴河進襲分爲三路直擣巢穴毀營三處斃賊
四五百人五月初一日斬賊復糾約土匪萬餘
併集英城該道親督光州等勇迎擊斃其頭目
十七人殺賊無算追至大畷河擒斬過半五月
初六日斬賊復竄英境該道親率各勇駐城防
守並派任春和等分防大畷河等處十一日斬

賊萬餘分路來撲該道帶勇出城猝遇多賊來
衝馬被矛傷墜地見賊衆我寡勢難取勝次日
遂飛調羅田各屬團練會勦時賊已入城該道
一面招聚散卒一面號召各路團練分數路由
英山西南北三門進攻該逆突圍而出被我軍
槍斃千餘人登時收復縣城各情伏念何桂珍
以二千疲勞之卒當羣盜出沒之區數月無餉

轉戰不休其從征員弁兵勇勞苦倍於他軍合
無仰懇

大恩准臣擇尤保奏

曾國藩又奏言查蘄黃英霍當皖楚之交萬山
回互匪黨最多近年以來南岸之大冶興國北
岸之蘄水蘄州黃梅廣濟土匪尤衆一經粵匪
勾結羣起響應幸羅田麻城黃岡黃安等縣紳

民好義團練殺賊歷有成效英山之民亦多深
明大義敵愾同仇該道何桂珍往來皖楚之界
已近一載各屬紳耆信義相孚每遇匱乏之時
鄉里常以篋壺犒軍屢次勦賊獲勝亦賴團練
之力合無仰懇

天恩飭下湖北安徽各督撫轉飭何桂珍督辦羅田英
山麻城等屬團練肅清皖楚各處土匪所需費

用准在各屬勸捐俾該道有專責之事而於大局亦有無窮之益一俟武漢克復羅澤南一軍勦賊東下該道與之會合仍可歸併臣軍奏入

上命軍機大臣傳諭官文胡林翼福濟曰據曾國藩奏已革道員何桂珍於正月間克復蘄水五月間克復英山復在羅田各屬疊獲勝仗堵剿尙屬認真已降旨將何桂珍賞給六品頂戴其出力員弁紳勇准會

國藩擇尤保奏現在皖楚兩省軍務方殷其交界處所每爲兩省兵力所不及如安徽之太湖宿松英山霍山湖北之黃梅廣濟蘄水蘄州羅田麻城土匪叢起旋復旋失非有專責之員督辦團練不能斷賊接濟之路何桂珍往來該處與各紳耆信義相孚頗資得力著卽飭令該員督辦各該屬團練將皖楚交界土匪次第勦除遇有賊蹤上竄湖北亦可從後要擊

所需糧餉准其於各該屬勸捐動用如皖楚兩省稍
有餘力仍著隨時接濟毋任飢疲潰散致誤事機

上諭內閣曰已革道員何桂珍勦匪勇往尙知愧奮著
賞給六品頂戴在事出力員弁兵勇著會國藩查明
保奏

會國藩又奏言水陸兩軍會攻湖口二十七日
聞賊由彭澤運來火藥戰船在流澌橋小河停

泊李元度派令胡蓋南等帶勇往勦焚其火藥
船戰船數號二十八日探得離湖口五里之柘
磯有偽關一座當派從九品彭斯舉等馳往勦
辦該逆棄關上船逃竄卽將偽關署及附近賊
巢一併焚洗正欲收隊忽下鐘山賊壘突出二
三百人來援我軍整隊迎擊先刃悍賊數名餘
匪敗退八月初三日探知安慶有賊千餘來援

湖口次日有騎馬賊二十餘人帶賊數百來蘇
官渡搦戰其伏山後者賊數尤夥當卽密派吳
齊源從間道抄賊之後度其將至以大隊過壩
迎擊礮斃二賊餘衆稍卻我軍大呼馳入手刃
執大旗賊五名計是日先後殺賊三百餘人生
擒十四名初八日約會水師併攻下鐘山賊壘
經馬房嶺及舊城賊營我軍分投槍入匪衆潰

散退守下鐘山我軍登嶺焚其望樓遂升月臺
山昇礮輪轟忽有三百餘賊拌死衝出登山奪
礮我軍併力截擊手刃十餘賊各勇疾馳跟追
已及下鐘山營門將乘勢衝入賊閉門死拒門
外尙有三十餘賊未能入壁悉爲我勇殲斃是
日水師併攻湖口賊船因風急水溜船勢直趨
下游被賊圍困共失去長龍三板二十一號初

九日五鼓賊乘勝來撲我水軍我軍嚴陣以待
賊至我船排列一字萬礮對轟賊佯爲退卻我
軍嚴立不動賊果回船衝突鏖戰三時之久轟
沈賊船二隻落水死者以百計始紛紛敗竄查
湖口僅賸下鐘山及梅家洲二卡石牆堅固屢
次血戰不能攻破惟有籌添勁旅再圖力勦至
水師因風順失利貽誤事機臣諄諄戒飭不許

順風開仗乃各弁勇不能遵守教令致蹈覆轍
殊屬輕進該五營營官都司秦國祿編修吳嘉
賓均撤去營官秦國祿失船較多並請

旨卽行革職孫昌國何啟長賀虎臣於次早賊匪撲營
時尙能奮勉堵勦轟沈賊船保全老營應免其
斥革仍請

旨拔去翎枝暫留營官之任奏入

上諭內閣曰此次水陸兩軍攻勦湖口業經疊次獲勝
著曾國藩督飭水陸諸軍奮力進勦迅圖克復潯城
所有管帶水勇失利之保升都司秦國祿已革翰林
院編修吳嘉賓均著撤去營官秦國祿並著卽行革
職保升花翎都司孫昌國藍翎把總何啟長藍翎縣
丞賀虎臣均著拔去翎枝暫留營官以觀後效

曾國藩又奏言臣於七月初一日欽奉

諭旨因湖南賊氛四逼

飭令調回湘勇 臣前與羅澤南面商大局以湖口之與武漢皆東南所必爭論目前形勢則先爭武漢而後可以保全鄰省能保全完善之省而後可以規復被陷之區羅澤南抵南康後亦慨然以援鄂爲己任遂定回勦武漢之計已由義甯進擣崇通一帶西上武昌湖北一省西凌阿官文

兩軍均在北岸惟胡林翼一軍向在南岸近聞
移師北渡進紮漢陽南岸極爲空虛設武昌之
賊逸出上犯則爲患方長得羅澤南一軍由崇
通截出直擣武昌是卽所以救鄂省南岸之疏
羅澤南所統湘勇訓練勇僅三千六百人臣又撥
給參將彭三元等勇一千五百名將領多諳練
老成士卒亦久征慣戰回武漢以勦粵匪則可

回湖南以勦土匪則不可方今東南大局卽不能遽破金陵亦當力爭江面若不力挽大局則一鄉一邑終無獨全之理合無仰懇

天恩飭下兩湖督撫諸臣羅澤南一軍不得調回南省其麾下五千人亦不得分枝調撥致兵力單薄難以圖功一俟鄂省北路肅清武漢得手臣仍飛調羅澤南前來會師以圖進取奏入報

聞

初七日

丁卯

向榮吉爾杭阿奏言鎮江之賊在東

門外修築礮臺初四日黎明臣吉爾杭阿派隊

赴煙墩山一帶督令開挖外濠余萬清督隊在

摩旗山屯紮以備援應其東路貴州湖南等營

均令嚴陣以防賊衝午刻果有三千餘賊突出

東北二門直撲湖南貴州營盤另有一股由寶

塔山擁至抄我京峴山後路又由甘露寺出賊數百人牽掣東馬頭守牆兵勇當經官兵前後抄擊該逆披靡另有南水關潛出賊匪數百人經副將站任帶勇迎擊余萬清督隊衝殺先後斬馘甚衆該逆復以大股由西門蠡擁而出江中復有賊船二十餘隻登岸援應其時我軍已由煙墩山齊抵寶蓋山下知府劉存厚總兵虎

嵩林等各帶兵勇四面兜擊該逆抵死抗拒我軍奮勇爭先賊始敗退寶蓋山梁在高處施放槍礮佐領額哲赫督隊槍上中礮陣亡斯時該逆飛彈如雨復欲衝擊而下虎嵩林督隊迎擊被槍子打入左頸臣吉爾杭阿親往督陣揮令車礮直前轟擊虎嵩林雖受槍傷仍復冒險直衝而上賊始奔竄回城初五日我軍分三路嚴

陣以待該逆以數千人直撲大營因見我軍嚴
整不敢向前臣吉爾杭阿登高督戰伺賊稍懈
督令西門外分東西兩路直抄賊後卽以車礮
從中路連環進擊該逆前爲礮傷後懼圍抄立
時潰散初六日賊分三股出撲我軍亦分路迎
擊斃賊無算次日黎明瞭見寶蓋山上新築板
牆中雜泥土牆外山梁復圍築土堦一道上架

槍礮該處近接西門本爲該逆進出銀山必經
之路當飭各營出隊進攻該逆以千餘人前來
抗拒我軍迎擊鏖戰四時之久賊勢漸敗退入
土牆經遊擊饒永福槍上山梁劉存厚周兆熊
繼之當將土堦犁拆臣現飭周兆熊等於煙墩
山南竈濠紮營三座陸續將大礮運往安以此
地扼要居衝足以遏賊奔竄仍飭令隨時相機

進勦以期迅掃妖氛奏入

上諭內閣曰鎮江賊匪業經三面圍攻勢漸窮蹙著吉爾杭阿等迅速進攻將寶蓋山賊匪悉數殲除攻克鎮江府城總兵虎嵩林身先士卒奮勇可嘉著賞給額圖琿巴圖魯名號佐領額哲赫追賊陣亡殊堪憫惜著交部從優議卹以慰忠魂

初八日

戊辰

西凌阿綿洵奏言

臣

等連日督兵進

攻德安府城該逆閉門不出城內拒守甚嚴難於得手正擬撤隊詎該逆由東門地道擁出三百餘名意欲襲我後路經平海馬隊從旁抄擊逆匪敗回復由西門突出五六百名直撲隨州團勇該勇見賊勢兇猛全行退卻經舒洪元高仰京勇隊渡河助剿舒保馬隊由東河岸抄襲其後該逆始敗退入城頃接官文來咨以金口

失利南兵潰挫起程北上會合夾攻二十五日
參將顏朝斌進至府城南二十餘里之河壩橋
約期進剿難城南別無他兵該參將一軍兵力
微單須俟官文到郡西南合兵聲勢聯絡始能
得力五營義勇屢經隨營打仗孰意二十五日
進隊時中營義勇內有二三名奔往賊夥並有
由營私逃不能指實去向者統計十數名臣等

每於紮營進隊必當加意慎防以免貽患奏入
上命軍機大臣傳諭西凌阿綿洵官文曰此次我軍分
路進攻德安該逆閉門堅守迨義勇撤隊該匪輒由
地道擁出西門亦有賊匪突出撲營雖經馬隊截擊
該逆並未大受懲創該大臣等統領大軍屢次進攻
總未得手設下游賊匪紛紛上竄賊援愈衆則賊守
益堅安望卽時克復至隨州勇隊見賊退卻義勇多

人又投入賊夥似此漫無紀律何以操勝算而挫兇
鋒著該大臣等嚴申軍律激勵將弁兵勇迅圖克復
郡城官文此時諒已前赴德安參將顏朝斌在城南
紮營兵力較單恐未可深恃該督務當趕緊前進與
西凌阿等四面環攻以期力破賊巢毋稍延緩

初十日
庚午托明阿陳金綬雷以誠奏言據總兵

葉常春等稟稱八月初七日金陵駛來賊船數

三十一
三十一
十隻直撲浦口該鎮等帶勇截剿擊沈賊船五隻餘船靠往南岸奔逃卽督兵勇尾追適武慶添撥巡江水勇協同進剿奪獲大船一隻又據遊擊鄧鳳林等稟稱八月二十日探得賊船三十餘隻駛至西江口登岸分撲新江口雞心洲各地方該文武督兵迎剿立斃執黃旗賊目一名賊勢不支狂奔上船兵勇追至江濱擊沈賊

船三隻復奪獲四輪賊船一隻軍械多件又據
總兵泊承隆稟稱十五日夜舟師襲瓜州賊簿
及靠南一帶賊營兵丁吳國喜一躍上簿手燃
火藥賊衆驚覺岸賊亦紛紛來救金山南面駛
來賊船數十隻金山之賊亦開礮相助縣丞周
閑等突入賊中競燃火礮立沈賊船多隻奪獲
大船一隻至陸路攻勦情形自西面長圍竣事

之後逆賊不能旁竄正可專力進攻惟當懷遵
諭旨激勵水師截斷江面杜其接應並約會吉爾杭阿
南北齊攻庶可早復瓜鎮奏入

上命軍機大臣傳諭托明阿陳金綬雷以誠曰此次浦
口等處雖經勦辦得手而上下游賊船往來無定難
保不另生詭計仍應嚴飭水師實力勦洗瓜州久爲
賊踞陸路諸軍日久並未進攻所築長圍僅能防賊

旁竄而濱江一帶仍未能遏截賊蹤若非水陸併力
進攻勦辦何能藏事著托明阿等督飭水陸大軍奮
力夾攻並約會吉爾杭阿同時進攻鎮江俾南北兩
岸賊匪不能互相援應庶可直搗賊巢